



Sesida dals

4 da december 2023

Communitgà ils

5 da december 2023

Protocol nr.

934/2023

Incumbensa Rutishauser

concernent structuras intermediaras en la tgira ed assistenza da personas
attempadas

Resposta da la Regenza

Cumplementarmain a las chasas da tgira ed als servetschs da Spitex pon structuras intermediaras gidar a cuvrir almain per part il basegn creschent da tgira da personas attempadas e da tgira da lunga durada. Las structuras intermediaras che vegnan tematisadas en l'incumbensa, cumpiglian furmas da l'abitar assistì, dimoras da curta durada en chasas da tgira sco er en structuras da di e da notg. Tut questas purschidas pon gidar, che personas che basegnan tgira ed assistenza n'entran betg en ina chasa da tgira u alura pir pli tard. Dimoras da curta durada en chasas da tgira ed en structuras da di e da notg distgargian ils servetschs da Spitex ed eventualmain er las personas che tgiaran lur confamigliars, betg dentant las chasas da tgira. Ultra da las structuras intermediaras duai er vegnir menziunà l'agid da las personas che tgiaran lur confamigliars.

Mintga 5 onns vegn actualisada la planisaziun generala chantunala da las chasas da tgira. Quai duai garantir, che la planisaziun dal basegn da letgs da tgira a media ed a lunga vista è accordada cun il svilup demographic e cun la dumonda.

L'onn 2022 ha l'Obsan sviluppà in nov model da prognosa per il basegn da tgira da personas attempadas e da tgira da lunga durada en Svizra. Quest model da prognosa pussibilitescha als chantuns d'extender las prognosas dal basegn sin la tgira ambulanta e sin las structuras intermediaras sco er da simular ils currents da substituziuns tranter las differentas structuras. Il model da prognosa po vegnir adattà als fatgs ed als basegns chantunals specifics e cumplettà cun atgnas datas chantunalas. Uschia èsi pussaivel da planisar pli exactamain l'entira tgira da personas attempadas e da tgira da lunga durada en il chantun.

La planisaziun generala chantunala actuala da las chasas da tgira datescha da l'onn 2020. Per actualisar la planisaziun generala chantunala vegn l'Uffizi da sanadad ad utilisar l'onn 2025 las novas pussaivladads dal model da l'Obsan. En il rom da l'elavuraziun da la nova planisaziun generala chantunala 2025 vegn el ad incumbensar

en quest senn l'Obsan da sclerir er il basegn da purschidas intermediaras ed uschia da preschentar, tge structuras da provediment che correspundan als basegns. Competentas per sviluppar questas structuras da provediment èn lura las regiuns da provediment da la sanadad. Il problem il pli grond en connex cun la realisaziun dastgass esser la mancanza da persunas spezialisadas. Tenor tut las prognosas existentas ston ins partir dal fatg, ch'il basegn da tgira da persunas attempadas e da tgira da lunga durada vegnia a s'augmentar cleramain ils proxims decennis pervia dal svilup demographic da la populaziun. Tenor il Rapport naziunal da provediment 2021 da l'Obsan vegni a dar in basegn da 43 400 tgirunzas giuvnas e tgirunzs giuvens dal stgalim terziar en l'entira Svizra fin l'onn 2029. Tar il persunal da tgira e d'assistenza dal stgalim secundar Il vegn stimà in basegn da 27 100 persunas. Il chantun Grischun dastgass esser pertutgà pli fitg da la mancanza da persunas spezialisadas che la media svizra, perquai che la cumpart da persunas attempadas è pli auta e perquai ch'il dumber da naschientschas è stà durant onns sut la media.

Areguard la finanziaziun da las purschidas intermediaras renviescha la Regenza a sia resposta a l'incumbensa Degiacomi dals 5 d'avrigl 2022, communitgada ils 8 d'avrigl 2022, concernent impuls en favur da la finanziaziun da la tgira ambulanta e staziunara (prot. nr. 261/2022). En questa resposta ha la Regenza empermess da prevair – en il rom da la proxima revisiun parziala da la Lescha per promover la tgira da persunas malsaunas, e quai ultra da las basas existentas – mesiras che han l'intent d'extender respectivamain da sustegnair las purschidas da la tgira e da l'assistenza ambulanta, sco en spezial l'indemnisaziun finanziaria dals custs fixs per letgs da tgira da dimoras curtas en chasas da tgira, ma er ulteriuras purschidas da sustegn che han en mira da distgargiar las persunas che tgiaran lur confamigliars. L'Uffizi da sanadad ed il Departament da giustia, segirezza e sanadad èn actualmain vidlonder d'elavurar in project correspondent.

Sa basond sin questas explicaziuns propona la Regenza al Cussegl grond d'acceptar l'incumbensa qua avant maun.



En num da la Regenza

Il president:

Peter Peyer

Il cancellier:

Daniel Spadin